

ooooo ▽▽▽ ooooo ooooo ▽▽▽ ooooo ooooo ▽▽▽ ooooo

Madeline Nora Bernard

Naqtmuksi'k Mlki-matnaqatinew
aqq Mlkna'tinew

ooooo ▽▽▽ ooooo ooooo ▽▽▽ ooooo ooooo ▽▽▽ ooooo



Madeline Nora Bernard

Nora Bernard ke'sk mimajijek wejietaq metue'kek, weji-sapawsimk aqq melkuktumuk koqqwaja'taqn wjit L'nu'k. Wejikwetaq penoqo'tasimk aqq weji-ksika'tumk L'nuey aqq Teli-l'nuimk, melki-matneketaq msit wen kjijitun tetuji-penoqo'tasultipnik L'nu'ji'jk Etlqatmumkl Kina'matnewo'kuo'ml Kanata. Wtaknutmaq nemitumk tel-melknass matmn penoqo'taqn. Kanataewaqq nike' poqji-ila'mua'tiji L'nu'k kwilmi'tij apiksiktuaqn, wtaknutmaq keknu'e'k wjit tel-se'saknutmumk koqoey kis-tliaq aqq ketlewa'tumk teli-o'pla'luj L'nu'k.



Nutqwe'kek aqq Tel- we'tua'lsip Etlqatmumkl Kina'matnewo'kuo'ml

Nora, L'nu tleyawit Niktuipukwek L'nue'kati, No'pa Sko'sia, weskwijinuip Wikumkewiku's 22, 1935ek. Katu pilua'siksip ta'n tele'k 1944-ek, pesqunatek tewije'kek lukewinu elukewaji Kaplno'lal koqqwa'lasn aqq elkimasnl Sipekne'katik Etlqatmumk Kina'matnewo'kuo'm. Ula newte'jkip Etlqatmumk Kina'matnewo'kuo'm Mi'kma'ki. Nkutey pilue'l Etlqatmumkl Kina'matnewo'kuo'ml etekepn msit tami Kanata ketu'-kiwaska'la'tipni L'nu'ji'jk, jikla'tuanew teli-l'nui'sulti'tij, telo'l'ti'tij aqq teli-l'nu-ulti'tij.

Lukewinu'k elukewa'tiji Kaplno'lal, ta'n nujo'tmi'tip tel-wije'wasik ula kela'kwenawek Kaplno'lewey Teplutasik wjit L'nu'k "Indian Act", ilutmi'tip ta'n kis-tla'taqatitaq L'nu'k, we'kaw tel-kina'masimk, aqq kisi-tuita'new L'nue'katik. Amujpa weja'tupni lukewinu'k elukewa'tiji Kaplno'lal asite'lsuti elmiaq ktu'-nqatmumk L'nue'kati jel we'kaw newte'jk na'kwek. Nora weskwijinuip na telo'tasimkek—eksuo'qn ewe'wasiksip weji-smaqa'lujek wutanmk aqq ika'lujek kina'matnewo'kuo'm tel-lukwek jikla'tun ta'n wenij L'nu.

Entumk Teli-l'nuimk aqq Kaplno'lewey Teplutasik wjit L'nu'k

Ta'n telapukuek na tujiw Kaplno'lewey Teplutasik wjit L'nu'k, L'nu'sk malie'wi'tij ji'nml mu L'nu'l na nekm n'tutew teli-l'nuij. 1955ek Nora malie'wi'tisn ji'nml mu L'nu'l, na mu nuku' Kanataewey Kaplno'l teli-ksua'laql nkutey L'nu. Na elt wunijink mu teli-ksua'luksikipnik nkutey L'nu'k. Aqq elt pasik L'nu'k wesko'tmi'tij L'nu'ey Keknuite'taqn kisi-wikultipnik L'nu'e'kati, na Nora aqq wunijink mu kisi-wikultikipnik L'nu'e'katik. Ewi'kap tepow L'nu'e'katik katu mu asite'tmatip wikin kiswa tlikwenan wunijink L'nu'e'katik.

1985ek Kaplno'lewey Teplutasik wjit L'nu'k ankua'tasikip wiaqtekn Kisutasik C-31 (Bill C-31) assite'tasin L'nu'skwaq malie'wulti'tipni Mu L'nu'k apaji-tli-ksua'luksinew L'nuin. Katu, ula weji-ila'luek wiaqtekl o'pla'luekl – Kisa'toql pile'l tel-tepkise'kl Teli-l'nuimk, Mijua'ji'j wunki'kuk L'nu'l aqq ktikl mu L'nu'l tlueten nekm wesko'tk 6(2) telpukuimk kiswa tluenes A'qati-l'nu aqq 6(1) tli-ksua'laten Puktaqi-L'nuin. Tlia'j na apaji-msnip tli-ksua'luksin Puktaqi-L'nuin, Nora mu ankmayiw apajite'lmuksikip wutanmk, aqq pikwelkl metlasipunqekl pemiaqapn mi'soqo apajite'lmujek.

Matnakemk wjit Koqqwaja'taqn

Maw-ki'k kisa'toqip Nora-o'q na tetuji-mlkita'p aqq melkuktikip matnekewaji ta'nik Wejita'liji penoqo'taqn Sipekne'katik Etlqatmumk Kina'matnewo'kuo'm. 1987ek, poqji-wikumapni Wejita'liji wi'kk etek Punamu'kwati'jk, No'pa Sko'sia kis-aknutmnew ewlo'tasimk wejita'tij. Aknutmaqnmual wejiaq eltumkip mawio'mi wtlukwaqnuew klusultinew wjit Sipekne'katik Etlqatmumk Kina'matnewo'kuo'm wejita'jik. Nora mu kispnekip e'tmalsewaji, matnaket wjit ta'n Kaplno'l Kanata aqq Alasutuo'kuom teli-o'pla'la'tij mijua'ji'jk elkima'tiji ula etlqatmumkl.

Nora tel-mlknat aqq melkuktik koqoey mesiapni Kaplno'l Kanata . Ta'n kisa'toq me'sua'toqip tetuji ewlo'tasipni mijua'ji'jk Sipekne'katik, aqq kisa'lapni Wejita'liji mawkwanew telki'k Kanata aqq pekwatup ketlewite'tasultinew L'nuey Mawio'mi aqq Inuit Tapiriit Kanatami. Tel-matnaket keknu'e'kip wjit tel-sapa'sik L'nue'l Etlqatmumk Kina'matnewo'kuo'ml Mesikesimk 2006ek, wejiaq \$1.9 billion tepisa'tasiktn wjit teli-apankituj Wejita'liji Etlqatmumkl Kina'matnewo'kuo'ml. Mi'soqo 2012-ek suel 80,000 Wejita'liji Etlqatmumkl Kina'matnewo'kuo'ml apankitusnik wjit ta'n tel-penoqo'tasulti'tij aqq teli-mtue'k mikwite'tmumk koqoey wejita'tij.

Koqoey Kisi-nqatmuksi'k aqq Ketlewite'lmu'k

Ansue'k, mu petawsikaq Nora-o'q nmittun tetuji-keknuite'tasik kisi-attiknetkek aqq keknuite'tasik. Nepkipnaq Kesikewiku's 26, 2007ek, awsma kisutasikék suliewey apankitten. Mu petawsikaq nmitu'n kaqama'tasik Alsusutiey wjit Ketlewo'qn aqq llkwija'taqn, kiswa Kanataewey Kaplno'l kwilutkek apiksiktuaqn 2008ek.

Tlia'j ki's-nepkip, ta'n koqoey naqtmuksi'k Nora me' pemikwekip. 2008-ek ki's kisi-npikék iknmup Kisutaqn wejiaq No'pa Sko'sia keknuite'tasit wjit telukewaj Wejita'liji Etlqatmumkl Kina'matnewo'kuo'ml. Tetuji-attiknetk aqq nikana'luet nikan-awti'kewapni pilue'k Wejita'liji Etlqatmumkl Kina'matnewo'kuo'ml panaknutmnew kis-tlitpia'ti'tij aqq kwilutmnew koqqwaja'taqn.

Wikewiku's 30, 2023, keknuite'tasikip koqoey Nora-o'q kisa'toq. Awti Kjipuktuk i'tluisikip Cornwallis Street nike' teluisik Nora Bernard Street. Keknuite'tasin wtlukwaqn teli-pkitawsij aqq tetuji-wla'laj Mi'kmaq aqq Wejita'liji Etlqatmumkl Kina'matnewo'kuo'ml. Nora aknutmaqnm mikwimuksi'k me' pem-matnaqati'k wjit koqqwaja'taqn, aqq mlkuktumk, melknamk aqq mawkwamk ta'n pasik koqoey kisi-sa'se'wa'tten.

NORA BERNA



Tel-we'tua'lsip Etlqatmumki Kina'matnewo'kuo'ml

1726 –

Wisunn mesqan-
wikasikl
Ankukamkewey
wjit Wantaqo'ti aqq
Wela'matultimkewey.

1857 –

Gradual Civilization
Act kisutasik kulaman
L'nu'k wli-ksua'taq
"Aklasie'wey
Telo'ltimk" aqq
puna'ttaq L'nuey
Telo'ltimk.

1752 –

Ankukamkewey
wjit Wantaqo'ti aqq
Wela'matultimkewey
pilua'tasik aqq
Saqamaw Jean-
Baptiste Cope
mesqanwi'kik
wtuisunm.

1831 –

Mawi-amskwesewey
Etlqatmumk
Kina'matnewo'kuo'm
panta'tumk
– Kwetejuey
Etlqatmumk
Kina'matnewo'kuo'm
panta'tumk Brantford,
Ontario.

1763 –

Eleke'witewey
Teplutasik, kisutk
tplutaqn-iktuk ta'n
tla'matultiten L'nu'k.

1779 –

Kespi-ketlewa'tasik
Ankukamkewey
wjit Wantaqo'ti aqq
Wela'matultimkewey.

1867 –
British North America Act, Kanata kisitasik.

1869 –
Gradual Enfranchisement Act: kisitasik wjit wen "L'nuit" aqq piskwa'tumkl wije'wmumkl ta'n tli-wiaqa'laten L'nu'k Kanata aqq ksika'tten L'nuey telo'timk.

1876 –
L'nuey Tplutaqn kisutasik aqq wije'wmumk.

1885 –
L'nuey Tplutaqn ankuwa'tasik naqa'tu'n L'nue'l Tepiaqewe'l.

1920 –
Amujpa mijua'ji'j tewijo'ltijik 7-15 elkimujik Etlqatmumkl Kina'matnewo'kuo'ml.

1951 –
L'nue'l Tepiaqewe'l apajiw asite'tasikl; L'nu'skwaq kisi-naspultitaq Mawaknutmamkl L'nue'katik.

1961 –
L'nu'k kisi-wiaqa'lsultijik elapukuemkl aqq ma' entuk Teli-l'nuimk.

1981 –

Constitution

Ankua'tasik
ketlewa'tun L'nue'l
Koqqwaja'taqn
Kanata.

2008 –

Kanataewey Kaplno'l
kwilutk apiksiktuaqn
wjit Etlqatmumkl
Kina'matnewo'kuo'ml.

1985 –

Bill C-31:

L'nuey Tplutaqn
ankua'tasik,
L'nu'skwaq
maliewulti'tiji
wenik mu L'nu'k
apaji-msntaq Teli-
l'nuwulti'tij (kisa'toq
piley wije'wmumk
wjit wen Kisi-
l'nuitew kiswa moqo.

2005 –

AFN apiskwa'toq
mawi-msimut
Kanataewey Kaplno'l
wjit ta'n me' wjit
tetuji-we'tua'luek
Etlqatmumkl
Kina'matnewo'kuo'ml.

1998 –

L'nuey Nepisimkewey
kaqama'tumk.

1996 –

*RCAP (Royal
Commission on
Aboriginal Peoples)*

kaqi-kisa'tasik
aqk Kinua'taqney
tewa'tasik kwilutasik
pipanuijkaqn wjit
msit ta'n te'simk
ika'tasiktn wjit
tetuji-we'tua'luek
Etlqatmumkl
Kina'matnewo'kuo'ml

1996 -

Nora Bernard
piskwa'toq
mesikesimk.

2008 –

Nora Bernardo'q ki's
kisi-npíkek iknmup
Kisutaqn wejiaq
No'pa Sko'sia.

2023 –

Wikewiku's 30, awti
Kjipuktuk il-wi'tasik
tluisiktn Nora
Bernard Street.

2009 –

Kaqama'tasik
Alsusutiey wjit
Ketlewo'qn aqq
Ilkwija'taqn(TRC).

References

<https://indigenouspeoplesatlasofcanada.ca/article/redress-and-healing/>

https://engineersnovascotia.ca/news/view/?news_id=293

<https://laws-lois.justice.gc.ca/eng/acts/i-5/page-2.html#docCont>

<https://www.thecanadianencyclopedia.ca/en/article/indian-residential-schools-settlement-agreement>

<https://www.rcaanc-cirnac.gc.ca/eng/1100100015644/1571589171655>

<https://www.rcaanc-cirnac.gc.ca/eng/1689777364741/1689777394126>

<https://nctr.ca/records/reports/>



www.kinu.ca